



**Broj: 02-50-1-16-6/07
Sarajevo: 5.7.2007.**

**BOSNA I HERCEGOVINA
PARLAMENTARNA SKUPŠTINA
ZASTUPNIČKI DOM**

PREDMET: Obavještenje

Dom naroda Parlamentarne skupštine Bosne i Hercegovine na 6. sjednici održanoj 29.6.2007. godine razmatrao je sljedeće:

1. Prijedlog zakona o izmjeni Zakona o službi u Oružanim snagama BiH (prvo čitanje);
2. Izvještaj Predsjedništva BiH o donesenim odlukama o pomilovanju za 2006. godinu;
3. Godišnji izvještaj Visokog sudskog i tužilačkog vijeća BiH;
4. Izvještaj o poslovanju Ureda za reviziju institucija BiH za 2006. godinu;
5. Izvještaj Ad hoc komisije o ispitivanju opravdanosti podnesenih prigovora na utvrđenu rang-listu za izbor generalnog revizora i zamjenika generalnog revizora u Uredu za reviziju institucija BiH;
6. Davanje saglasnosti za ratifikaciju Sporazuma o vojnom grantu između Vijeća ministara BiH i Vlade Republike Turske i Implementacionog protokola koji se odnosi na finansijsku pomoć između Ministarstva odbrane BiH i Generalštaba Republike Turske;
7. Davanje saglasnosti za ratifikaciju Sporazuma između Bosne i Hercegovine i Sjevernoatlantske ugovorne organizacije (NATO-a) o sigurnosti informacija;
8. Davanje saglasnosti za ratifikaciju Sporazuma između Vijeća ministara BiH i Vlade Republike Slovenije o saradnji na polju odbrane;
9. Davanje saglasnosti za ratifikaciju Sporazuma o uspostavljanju željezničke mreže velikih mogućnosti u jugoistočnoj Evropi;
10. Davanje saglasnosti za ratifikaciju Sporazuma između Vijeća ministara BiH i Vijeća ministara Srbije i Crne Gore o vraćanju i prihvatanju lica koja ne ispunjavaju, ili više ne ispunjavaju uslove za ulazak ili boravak na teritoriji druge države;
11. Davanje saglasnosti za ratifikaciju Konvencije za objedinjavanje određenih propisa u međunarodnom zračnom prijevozu;
12. Davanje saglasnosti za ratifikaciju Sporazuma između Vijeća ministara BiH i Vlade Republike Hrvatske o saradnji u nadzoru državne granice;
13. Davanje saglasnosti za ratifikaciju Privremenog ugovora o slobodnoj trgovini između Vijeća ministara BiH i Misije privremene uprave Ujedinjenih naroda na Kosovu;
14. Imenovanje tri delegata iz Doma naroda u Interresornu radnu grupu za pripremu teksta prijedloga zakona o izmjenama i dopunama zakona (Izbornog zakona BiH, Zakona o sukobu interesa u institucijama vlasti BiH i Zakona o finansiranju političkih stranaka);
15. Informacija o preduzetim aktivnostima s ciljem prevazilaženja problema u radu Ureda za razmatranje žalbi i eventualnih posljedica koje mogu nastati u radu Ureda za razmatranje žalbi primjenom pojedinih važećih propisa s prijedlogom zaključka;

16. Prijedlog odluke o osnivanju i djelokrugu međuparlamentarnih grupa prijateljstva Parlamentarne skupštine BiH za bilateralnu saradnju s parlamentarnim tijelima drugih zemalja;
17. Prijedlog Pravilnika o međunarodnim aktivnostima PSBiH;
18. Razmatranje tromjesečnog finansijskog izvještaja Ureda za reviziju institucija BiH za 2007. godinu
19. Razmatranje informacije o održanom sastanku sa predstavnicima Svjetske banke
20. Davanje saglasnosti za ratifikaciju Osnovnog ugovora između Bosne i Hercegovine i Svete Stolice i Dodatni protokol na Osnovni ugovor;

Ad-1.

Dom naroda usvojio je u oba čitanja Prijedlog zakona o izmjeni Zakona o službi u Oružanim snagama Bosne i Hercegovine. Zakon je usvojen u istovjetnom tekstu kao na Zastupničkom domu.

Ad-2.

Dom naroda primio je k znanju Izvještaj Predsjedništva BiH o donesenim odlukama o pomilovanju za 2006. godinu.

Ad-3.

Dom naroda usvojio je Godišnji Izvještaj Visokog sudskog i tužilačkog vijeća BiH sa sljedećim zaključcima:

1. Dom naroda je konstatovao da je Izvještaj metodološki i sadržajno dobro urađen te da može služiti kao osnov za daljnje korake, koje trebaju preduzimati ostali organi u reformi pravosuđa.
2. Dom naroda ukazuje na potrebu aktivnije saradnje s Visokim sudskim i tužilačkim vijećem BiH u cilju jačanja uloge Visokog sudskog i tužilačkog vijeća BiH kao odgovornog tijela u osiguranju principa nezavisnosti i odgovornosti pravosuđa u Bosni i Hercegovini.
3. Predlaže se da Visoko sudsko i tužilačko vijeće Bosne i Hercegovine zajedno sa ostalim sudovima preduzme dodatne aktivnosti na aktiviranju i provođenju procesa medijacije u BiH a da se to ne završava samo na pilot projektima u Sarajevu i Banja Luci.

Ad-4.

Dom naroda usvojio je Izvještaj o poslovanju Ureda za reviziju institucija BiH za 2006. godinu sa sljedećim zaključcima:

1. Ured za reviziju institucija Bosne i Hercegovine dužan je Parlamentarnoj skupštini BiH dostavljati izvještaje u skladu sa članom 6. Zakona o reviziji institucija Bosne i Hercegovine;
2. Dom naroda Parlamentarne skupštine BiH obavezuje Komisiju za finansije i budžet da, u skladu sa Zakonom o reviziji institucija Bosne i Hercegovine, a u saradnji sa Komisijom za finansije i budžet Predstavničkog doma Parlamentarne skupštine BiH, formira komisiju koja će imenovati nezavisnu revizorsku kuću radi revizije godišnjih finansijskih izvještaja Ureda za reviziju institucija Bosne i Hercegovine;
3. Dom naroda Parlamentarne skupštine Bosne i Hercegovine obavezuje Komisiju za finansije i budžet da, u skladu sa Zakonom o reviziji institucija Bosne i Hercegovine, imenuje podkomisiju koja će izvršiti pregled završnog izvještaja Ureda za reviziju institucija Bosne i Hercegovine za 2006. godinu;
4. Dom naroda Parlamentarne skupštine Bosne i Hercegovine smatra da treba poboljšati obradu revizorskih izvještaja, a posebno negativnih i onih sa rezervom, putem aktivnije komunikacije Komisije za finansije i budžet i Ureda za reviziju institucija Bosne i Hercegovine;

5. Dom naroda Parlamentarne skupštine Bosne i Hercegovine predlaže Uredu za reviziju institucija Bosne i Hercegovine da organizuje obuku članova Komisije za Finansije i budžet radi boljeg praćenja i analize revizorskih izvještaja

Ad-5.

Dom naroda je u vezi sa razmatranjem Izvještaja Ad hoc komisije o ispitivanju opravdanosti podnesenih prigovora na utvrđenu rang-listu za izbor glavnog revizora i zamjenika glavnog revizora Ureda za reviziju institucija BiH, usvojio Odluku kojom se poništava javni konkurs za izbor generalnog revizora i zamjenika glavnog revizora Ureda za reviziju institucija BiH, te imenuje nova komisija.

U novu komisiju za izbor generalnog revizora i zamjenika glavnog revizora Ureda za reviziju institucija BiH, ispred Doma naroda izabrani su: Alma Čolo, Dušanka Majkić i Ivo Miro Jović.

Ad-6-8.

Dom naroda dao je suglasnost za sve Sporazume iz ovih točaka dnevnoga reda.

Ad-9.

Dom naroda je dao saglasnost za ratificiranje Sporazuma o uspostavljanju željezničke mreže velikih mogućnosti u jugoistočne Evrope sa sljedećim zaključkom:

Obvezuje se nadležno ministarstvo da ispita i pokrene izmjene ovog Sporazuma radi uvrštavanja Unske pruge u mrežu velikih mogućnosti jugoistočne Evrope, s ciljem spajanja srednjo-jadranske luke sa pomenutom mrežom i budućeg kvalitetnog servisiranja potreba gospodarstva sjeverozapadne Bosne.

Ad-10-13.

Dom naroda dao je suglasnost za sve Sporazume iz ovih točaka dnevnoga reda.

Ad-14.

Dom naroda izabrao je Almu Čolo, Iliju Filipovića i Mladena Ivanića u Interresornu grupu za pripremu teksta Prijedloga zakona o izmjenama i dopunama Izbornog zakona, Zakona o sukobu interesa u institucijama vlasti BiH i Zakona o finansiranju političkih partija.

Ad-15.

Dom naroda primio je k znanju Informaciju o preduzetim aktivnostima s ciljem prevazilaženja problema u radu Ureda za razmatranje žalbi i eventualnih posljedica koje mogu nastati u radu Ureda za razmatranje žalbi primjenom pojedinih važećih propisa sa sljedećim zaključkom:

1. S obzirom na neefikasnost Zakona o javnim nabavkama Bosne i Hercegovine, obavezuje se Ured za razmatranje žalbi da u roku od 15 dana od dana prijema ovog zaključka zajedno sa Agencijom za javne nabavke Bosne i Hercegovine, sačini konkretan prijedlog mjera za prevazilaženje problema u radu Ureda za razmatranje žalbi.
2. Obavezuje se Agencija za javne nabavke BiH i Ured za razmatranje žalbi da u roku od 7 dana od dana prijema ovog zaključka sačine analizu Prijedloga izmjena Zakona o izmjenama i dopunama Zakona o javnim nabavkama Bosne i Hercegovine, koje je Vijeće ministara Bosne i Hercegovine 14.6.2007. godine dostavilo u parlamentarnu proceduru, i da na osnovu toga predlože eventualna poboljšanja teksta navedenog predloga zakona.
3. Zadužuje se Vijeće ministara BiH da, u skladu sa Zakonom o javnim nabavkama Bosne i Hercegovine, preduzme sve aktivnosti na popunjavanju radnih mjesta u Uredu za razmatranje žalbi

4. Traži se od menadžmenta Ureda za razmatranje žalbi da u roku od 7 dana od dana prijema ovog zaključka sačini i dostavi Domu naroda informaciju o preduzetim aktivnostima na prevazilaženju problema u radu Ureda za razmatranje žalbi i plan mjera za prevazilaženje organizacijskih problema
5. Obavezuje se Ured za razmatranje žalbi da u roku od 30 dana od dana prijema ovog zaključka sačini plan mjera za rješavanje žalbi i dostavi ga Domu naroda.

Ad-16.

Dom naroda usvojio je Prijedlog odluke o osnivanju i djelokrugu međuparlamentarnih grupa prijateljstva Parlamentarne skupštine BiH za bilateralnu saradnju s parlamentarnim tijelima drugih zemalja

Ad-17.

Dom naroda potvrdio je Prijedlog pravilnika o međunarodnim aktivnostima PSBIH

Ad-18.

Dom naroda usvojio je tromjesečni finansijski izvještaj Ureda za reviziju institucija BiH za 2007. godinu sa sljedećim zaključcima:

1. U skladu sa članom 6. stav 4. Zakona o reviziji institucija Bosne i Hercegovine, Komisija za finansije i budžet Doma naroda poziva Komisiju za finansije i budžet Predstavničkog doma Parlamentarne skupštine Bosne i Hercegovine da imenuje tri člana u komisiju za izbor nezavisne revizorske kuće za reviziju godišnjih finansijskih izvještaja Ureda za reviziju institucija Bosne i Hercegovine.
2. Ispred Komisije za finansije i budžet Doma naroda imenovani su: Dušanka Majkić, Hazim Rančić i Božo Rajić.
3. Komisija će iz stava (1) ovog zaključka imenovati podkomisiju koja će, u skladu sa članom 6. st. (5) i (6), izvršiti pregled Godišnjeg izvještaja o aktivnostima Ureda za reviziju institucija Bosne i Hercegovine.

Ad-19.

Dom naroda primio je k znanju informaciju o održanom sastanku sa predstavnicima Svjetske banke i donio Odluku da se Prijedlog projekta izgradnje institucionalnih kapaciteta Parlamentarne skupštine Bosne i Hercegovine u upravljanju javnim finansijama, jačanju transparentnosti i finansijske odgovornosti institucija Bosne i Hercegovine, uputi Vijeću ministara BiH sa ciljem da se ugradi u prijedlog koji će Vijeće ministara BiH dostaviti Svjetskoj banci.

Ad-20.

Dom naroda odložio je izjašnjavanje o davanju saglasnosti za ratifikaciju Osnovnog ugovora između Bosne i Hercegovine i Svete Stolicy i Dodatni protokol na Osnovni ugovor; za nastavak 6. sjednice Doma naroda.

v.d. TAJNIK
DOMA NARODA
Aljoša Čampara, v.r.